

IL TGIT SUTSILVAN

MASAGN

Da New Orleans a Masagn

La sonda digls 9 d'avust concerteschan igl ghitariet american *Jeb Rault* a las 20.00 a Masagn, Vitg Dafora 11. Jeb Rault e naschieu igls 1971 ad New Orleans, noua c'el à passanto la sia giuvantetgna. Là àl ear ampriu da sunar la ghitara, e davanto cantautur a cumponist. Dantant viva'l an Svizra, mo dat savens concerts agls Stadis Unieus ad an Europa. El sùna egna maschada da blues a rock, cun influenzas musicalas da la sia patria New Orleans. (fmr/bt)

ANDEER-JUF

La cursa d'Andeer a Juf incanta par la 42avla geada

Digls 1984 annà atira la cursa da velos d'Andeer a Juf mintg'on egna roscha da ziclists amateurs. Uon à la liac par la 42aval geada. Segls 28 km cun la diferenza d'òlzetga da 1144 m samasiran ziclistas ambiziusas a ziclists fervents, passànd la Val Farera par rivar agl final a Juf a 2126 m sur mar. Igl curs digls ons e'gl egna roscha da ziclistas a ziclists c'àn dumagnieu quella ruta pratensiusa, fagiànd records c'en puspe vagnieus egalissos. Ear la cursa da quest on ampurmata puspe duels captivants, prestaziuns maximalas a numerus spectaturs a spectaturs sper igl tschancùn da cursa.



Igl tgomp digls ziclists passa la Val Farera, a caschùn da la cursa digls 2023. FOTO MAD

Plaschers a records da beal'ora

La cursa digl on passo e stada da suzess cumplagn a resta an mimorgia a tuts. Da beal'ora a premissas parfetgas àn igls sportists pudieu mussar lur anschegn par dumagnear igl tschancùn da 27,4 km an tains impressiunants. Spezialmeing plaschevel e'gl sto, c'igl à do nigns incaps.

La generaziun giuvna S15, ca parta davent da Avras-Gröt, à musso prestaziuns remartgevas. Egn'otra culminaziun pigls giuvenils e stada la cursa par unfants agl Gòldet c'à atrag egn grand diember d'unfants, geniturs a spectaturs. Ear segl tschancùn e'gl sto blears spectaturs c'àn motivo igls ziclists, ascheia ca la cursa e betga me egn evenimaint sportiv, mobagn ear egna scuntrada populara.

La 42avla cursa sen ruca

Igls 10 d'avust à liac la 42avla cursa ziclistica d'Andeer a Juf. Ella vala puspe par la valitaziun da la Cupa grischuna. La cursa cumpeggia seat categorias. La partenza digls carschieus à liac a las 10.25 da davant igl Bogn mineral. A las 10.30 partan igls ziclists giuvenils S15 (anadas 2011–2014) davent da Cröt. Els àn da parcurer igl tschancùn da 9 km a da surmuntar 440 altimeters.

Igls numers da partenza vignan scumpartgieus da las 08.00 a las 09.30 an la tgea da scola d'Andeer. Mo igl e ear pussevel da s'anunztgear via internet. Anunztgeaders ca rivan suainter las 9.00 àn da pajear egn suplemaint da 20 fràncs. La contribuziun par carschieus amporta 40 fràncs a 15 fràncs pigls giuvenils S15.

La cursa pigls unfants à liac a las 12.30 agl Gòldet. Els àn da far duas rundas, quels cun la ple pintga diferenza da tains gudognan. L'anunztgea pigls unfants amporta 8 fràncs. Els fan part da la lotareia pigl velo sponsorisada da Sport Spleia a la tolareia Torri d'Andeer. Plenavànt e'gl tuts ca survignan egna medaglia da rancunaschientscha.

Pigl pievel da festa vean survieu sei an l'ustreia agl Gòldet, noua c'igl à liac ear la rangaziun anturn las 15.00. La cursa d'Andeer a Juf vean organisada sco an tut quels ons da l'Uniun da sport d'Andeer ca vean sustanida da blears donaturs a var 50 gidàntas a gidànters. (fmr/bt)

Agl «Tgitsutsilvan» dat la redacziun da la FMR eanda par eanda egnsguard sen pintgas a grandas novitads or digl teritori sutsilvan. La FMR selecziunescha a redaga quels texts a publicgescha els an La Quotidiana.



Theodor Gut digl Museum Stamparia da Strada a Laetizia Christoffel, la manadra digl Museum digls stgais da la catedrala da Cuira, àn introduitgieu agl art da stampar a scriver a la moda viglia.



Laetizia Christoffel, an la mandura medievala, à musso da scriver cun pema a la moda viglia.

Reviver igl tains medieval segl Mùnt Sogn Gion

Igl Mùnt Sogn Gion cugls stabilimaints digl casti a la baselgia e sainza dubi igl liac ideal par realisar egn «Gi digl Tains miez medieval». Diesch museums grischùns àn sapartizipo da que aranschamaint an sonda passada, purschànd giois medievals par famiglias a lur unfants.

BARTOLOME TSCHARNER/FMR

«L'idea oriunda e stada da stgafir egna purschida cultur-turistica par famiglias», palainta *Laetizia Christoffel*, la manadra digl Museum digls stgais da la catedrala da Cuira. «Mo alura e'gl sto *Guido Dietrich*, igl manader digl Museum digl Mester da Vuorz, c'à antretschio 10 museums grischùns da realisar egn evenimaint cuminevel surtut par famiglias.» Guido Dietrich aschunta: «Cun l'intenziun d'animar surtut geniturs cun unfants da vagnir els museums regiunals e d'admirar igls scazis culturals c'igl dat el Grischùn.»

Peia, mintegna da quellas 10 instituziuns à stgafieu egn agen program ca carmala famiglias cun unfants da sapartizipar – a forsia ple tard ear visitar egn near l'oter museum regiunal sen fundamaint da la sia purschida digl «Gi medieval». Lez à liac egn'eada ad on, numnadamieing mintgame ad egn oter liac. Antschiet à que tur agl Museum Retic a Cuira, ad uon e'gl vagnieu cuntinuo segl Mùnt Sogn Gion, que òlt sensum igl grep c'à survagnieu igl num tanor igl patrùn prinzipal da la baselgia ca stat segl plàn sper igl casti da Rialt sen l'Olta (Hochrialt) par disfrantzgear da Riòlta dafor Tgazzas.

Mo amadus nums darivan da la «riva òlta». Igl num *Reziòlta* (Hohenrätien) e egn'invenziun digl tains romantic ad à nigra basa istorica. Mo la baselgia digl Mùnt Sogn Gion (par tudestg «Johannisberg») eara davent da l'antschea digl cristianissem an la valada antocen igl 13avel tschantaner la baselgia prinzipala par la Mantogna a la Tumleasta.

Cugl sulegl e rivo igl pievel

Parveia da la fearma plievgia da sonda an dumàn mancava igl grand public. Mo da miezgi, cur c'igl tshiel e s'ansarano, e'gl tutegna sto passa 20 famiglias cun lur unfants a tantsa parsunas singulas c'àn fatg igl tur segl Crap Sogn



Cun egn crap àni gieu da far cupitgear la tschep, egna sort «la piertga».

Gion par sapartizipar digl divertevel program digls divers museums, cun giois medievals ad activitads da zambargear a malagear ca ragurdavan da lez tains. Ascheia àn igls unfants pudieu bater lur atgna muneda an la tenda digl Museum da las mineras da S-charl, antruvidos da *Peder Rauch* a *René Wäger*.

Dasperas an la «Tenda digls Tgavaliers» pudev'ign dissignear a malagear l'atgna standarta. An la tur à *Laetizia Christoffel* musso da scriver cun pema a la viglia, a *Theodor Gut* digl Museum Stamparia Strada à antruvido da squitshear cun lettras da plum. Dafartant ca *Eva Riediker* à musso da maschadar tes a tisànas sco i vagnevan fatgs sen casteals ad an clostras, near *Milena Legnini* da dissignear tavlas par dar mulegn-mulineala. Plenavànt e'gl va-

gnieu preschanto igl gioi da stgealas sviluppo digls 10 museums. Quel pratenda da far igl vieadi tras igl Grischùn, fagiànd staziun agls divers museums regiunals.

Tschentg disizplegnas

Da miezgi à alura antschiet igl turnier da giois d'anschegn cun tschentg disizplegnas sco p.ex. fierer igl fier da tgvails, egn sort dar la «piertga», taner egna cula an balàntschas ad oters. Ear que turnier à cato viva partizipaziun ad igls numerus victurs àn salegro digls premis. Ad ear Guido Dietrich à samusso cuntaint cugl dacurs digl «Gi medieval» c'à tutegna ànc carmalo tants da vagnir segl Mùnt Sogn Gion a giuder igls divertimaints medievals malgro l'ora malfrànca.



René Wäger digl Museum da las mineras da S-charl antruvida da bater munedas d'argient.



Igl «castelan» modern: Ruedi Jecklin, igl possessur digls stabilimaints segl Mùnt Sogn Gion.

FOTOS BARTOLOME TSCHARNER